

**Balua gba Polo
pi omabhuka na gudhu na
Kolosai
Eli na kalanu**

Polo aye nani balua inde pi okpala na Dadjua na Kolosai, gudhu na Adji Minele ne Efeso. Dadjua ango-o, Polo 'o nani ngae de, la-a, adu nani bhú ndu doto inde li Polo adu atsia 'kpí lie ngae. Abhomu-o, ani atsia atima okpala na kulu nayie bhú Efeso, 'ngbé gudhu na ndu doto na ngámá gba okpala na Loma inde bhú Adji-o. Padhá de, anga Polo adje nani me omusuno na eu abhú Dadjua na Kolosai. Ta ngú nasuno ango-o adu me ngubula nambila Ebhe ne nadu ne mukobho na kukulu-o, a ayo nadhege obhelesi okpala koko di ne ongámási na Ebhe. La-a, omusuno bhomu-o apa me, a ayo naziba namene ongú koko maka nakodho gandja, amba u kpata li lelele ongú pindji oehe nazu mazú, ne pindji ongú koko.

Polo aye balua pindji nasuno na kukulu gba makilisito ngubula naboyo onasuno na eu ango-o ko. Engú na ngbéngbé ani agie e, a ko me Yesu Kilisito ne angu ngú naha mukobho na kukulu. La-a, omabhuka koko ne ndu ongú u ngamene e ngato bha kpala bhú ngita. Li pápá gba Kilisito, Ebhe abho doto. La di li pápá gba ani-e, Ebhe atsia agie ndu oehe na doto hana pi ani. Yi da bhú makpetse ne Kilisito de-e,

mukobho dú pi okpála na doto de. Pipita-a, Polo ngapana mbámábá nasuno inde ngebéngbé inde pi omabhuka ngubula mukobho gba o-o.

Tisike inde anu ne balua gba Polo abhu Kolosai-e, adholo bhú dabili bini ne Onezime inde bali li Polo aye balua li 'ngú gba e pi Filemo-o.

Ongbengbe ongú inde bhú bhuku inde-e ngae inde:

Eli na kalanu 1:1-8

Mukobho gba Kilisito ne kulu gba e-o 1:9 – 2:19

Mukobho na mbia bhú Kilisito 2:20 – 4:6

Eli na soso 4:7-18

Polo yi omabhuka na gudhu na Kolosai mayi

¹ Ngama Polo, ma ne bhulu titima gba YesuKilisito . Padhá de, anga Ebhe akunda ngae, a la die-e Timoté, ndai ní. Ya aye balua inde-e ² pi okpála na bububu di na ngingbili gba Ebhe inde bhú gudhu na Kolosai, ondaise ní na mukunda inde abhuka Kilisito. A ayo me Ebhe 'Dyi ní tuko bisagu pí yi, amba ani ha di guo 'ngú pi yi.

Polo agie heni pi Ebhe

³ Ya ngagie heni pi Ebhe, 'Dyi Ngámá gba ní Yesu Kilisito ndu nedhinga hana ya ngayo Ebhe pi yi lie-o. ⁴ Padhá de, anga ya adje engú pindji nabhuka gba yi bhú Yesu Kilisito, di ne mukunda yi nde ne e pi ndu obubu okpála gba Ebhe-e hana-o. ⁵ Li ngali na kukulu 'ngú, inde Bádha Ngali akolo lie bhutsibhutsi na kalanu agba yi-e, yi atsia ambila 'ngú li engú inde li Ebhe awo e pi yi abhúlá-o. Abhomu-o, nabhuka gba yi

ne mukunda gba yi-e atsia alu pi engu inde yi nga'o 'to yi 'to e ango-o. ⁶ Bádha Ngali ango-o ngayangba, a la di ngazu nguwa píla doto libhomu. A amene bhadi pi yi moko li 'kpí inde yi adje engu lie pindji bádha bhú 'bu gba Ebhe-e lie-o, di ne yi ambila lie me bádha bhú 'bu ango-o kukulu-o. ⁷ Epafaladje, ndai ní na mukunda bhú kulu apa engu ango-o pi yi ngae. Ani ngamene kulu pi yi maka kpála na kulu na kukulu gba Kilisito. ⁸ Ani akpokpo 'ngu pi ya pindji mukunda inde li Bu Bhobua aha e pi yi-o. ⁹ Kaka-a, nayie li ekpi ya adje engu gba yi-e lie-e, ya ndala li nayo Ebhe pi yi de. Ya la di ngayo ka Ebhe me ani ha imbilangu na kpokpo kú 'ngu inde ngayie ka Bu Bhobua gba ani-e pi yi. Abhomu-o, yi tsia mbíla 'ngu inde ani akunda me yi mene e-o. ¹⁰ Yi tsia kóbho maka li Ngámá akunda lie-o. Yi tsia méne di ndu 'ngu hana inde ani akunda e-o. Yi méne ndu 'ngu na babadha hana, yi tsia mbíla Ebhe ndjindji. ¹¹ Ya ngayo ka Ebhe me ani bedhe yi ne angu na asasaua gba e bhú ndu 'ngu hana, ngubula me yi kibila ndu 'ngu hana ne 'ndjá bua. ¹² Yi gie heni pi 'Dyi ní Ebhe ne djali hana. Padhá de, anga ani aha angu pi yi ngu nasia tia inde ani awo e pi okpála gba e bhú kuti na mundayi na zi 'ke-o. ¹³ Ani agbegbe ní bhú angu na biti, ani atsia a'o ní bhú kuti gba e na mundayi gba Ndili gba e na mukunda-o. ¹⁴ Li pápá gba ani-e, Ebhe agbegbe ní bhú bali. Ani atsia ambu di li siti 'ngu gba ní-o.

Lele maka li Yesu Kilisito nde lie, la di ne kulu gba e-o

15 Ebhe inde u ti da nau e de-e ngau lie bhú
Kilisito.

A ko Ndili na kalanu,*
inde di pí 'ndji ndu 'he hana li Ebhe abho e-o.

16 Padhá de, anga Ebhe abho ndu 'he inde abhúlá
ne bhende

akuto-o hana li pápá gba ani:
oehe inde u ngau e,
ne bhende u uu e de,
osisiti bua inde ngau abhúlá, ne píla doto, inde
la di ne angu.

Ebhe abho ndu 'he hana li pápá gba ani.
Ani abho la di ndu 'he angu-o hana pí ani.

17 Kilisito bhú mukobho kala ndu 'he hana.
La di-e, ndu 'he hana inde bhú mukobho-o
alu li kute ani.

18 Ngaani-e, a ko 'ndji kute, inde Piga gba Ebhe-o.
Mukobho na mbia-a akpo lita e bhú ani, ani
ne Ndili na kalanu-o ngae.

A ko kpála na kalanu inde u azuku e bhú ká
okpála inde amu,
ngubula me ani du kpála na kalanu bhú ndu
'he hana ngae.

19 Padhá de, anga Ebhe apa me ni adú ndu 'kpí
hana bedhe má kpaka bhú
Ndili gba ni-o.

20 La di-e, ani agie nadje lio ne ndu 'he hana li
pápá gba Ndili gba e-o.

A na paká me li Kilisito atuko ngute e lie li
kulusi-e,

* **1:15** 1:15 Ndili na kalanu: A akunda napa me: ani adu nani
bhú mukobho kala ndu 'he hana inde li Ebhe abho e-o.

ani agie nadje lio ka Ebhe ne ndu 'he hana inde
 abhúlá,
 di ne bhende píla doto-o.

²¹ La ngayi-e, yi adu nani de Ebhe tsutsu. Yi adu obhulu yala gba ani ka ndu sisiti 'ngú hana inde yi adu abhundja e, di ne bhe yi adu amene e-o. ²² Engú bini, kabula nakpi inde li Ndili gba ani akpi e li kute e-e, Ebhe aholo matá nadje lie ne yi. Ani amene mo-o ngubula me yi kolo kala ni bubu, amba yi adú bhú zibotu de, yi adú la di bhú siti 'ngú de. ²³ Kaka-a, a ayo me yi lu kpekpeke bhú nabhuka. Yi ayie li kpadji na Bádha Ngali-e de, anga a ko ehe inde ní nga 'o 'to ní 'to e ko. Yi adje Ngali ango-o, u atsia akpokpo di pi ndu okpála hana. Ngama Polo, ma akolo kpála na kulu na Bádha Ngali ango-o.

Polo ngadje likabhu, ani di ngagu gbele ngú omabhuka

²⁴ Mbia inde-e, ma ngakpi djali ngú likabhu inde ma ngazu e ngubula yi ko. Padhá de, anga bhú kute ma-a, ma ngabedhe bhomu-o bhø likabhu inde li Kilisito a neke e ngubula kute e, inde Piga gba Ebhe-o. ²⁵ Ma akolo kpála na kulu na Piga gba Ebhe, nakpata lele kulu inde li Ebhe aha e muma ngubula yi-o. Ani aha muma kulu nakpokpo ngali gba e hana. ²⁶ Ngali ango-o, a ko engú gba ani inde ani awo nani e bhutode pi ndu okpála hana. Engú bini, mbia inde-e, ani ambamba tata pi omabhuka gba e-o.

²⁷ Padhá de, anga Ebhe akunda nambamba ta engú gba e inde ani awo nani e mawo-o pi uo. A ko engú inde ndjindji naali, ne asasaua, inde ani

aleke e pi ndu okpála hana. Engú ang-o ngae inde: Kilisito bhú yi, ani atsia apa pi yi ndjindji me yi alí bhú Asasaua gba Ebhe inde yi nga'o 'to yi 'to e-o. ²⁸ Kaka-a, ya ngakpokpo ngali gba Kilisito pi ndu okpála hana. Ya ngagbele 'dje okpála ne naha líli pi uo ne imbilangu hana, amba kpála ne kpála bhele bhú nabhuka bhú nakpøtø lío ne Kilisito. ²⁹ Kaka-a, ma ngamene kulu, ma la di ngagu gbele ne angu inde ayie ka Kilisito, inde la di ngamene kulu bhú ma ne angu hana-o.

2

¹ Ma akunda me yi mbila ndjindji me gbele inde ma ngagu e ngú yi-e kpekpeke. Ma ngagu gbele ang-o pi okpála na Laodikia, la di pi okpála koko inde i u nga ma de-o. ² Ma akunda me bua uo bedhe ne masi bedhe. U du bini bhú mukunda, u du la di ne djali hana bhú engú lí imbilangu na kukulu-o ngaha e-o. U tsia tí da nambila engú gba Ebhe inde awo lí e mawo-o. A akunda napa me, a ko Kilisito ngae makpe. ³ Ndu otia na imbilangu hana inde ayie ka Ebhe e awo líe bhú ani. ⁴ Ma ngapa 'ngú bhomu-o, amba kpála bini apíte yi ne babadha eli na eu de. ⁵ Abana ma nde líe de yi tsutsu bhú kate-e, ma ne yi bhú dabilí bini lí bhobua. Ma la di ne djali ngú nau me agba yi-e, ndu 'ngú hana ngadholo lí kúkú, yi alu la di kpekpeke bhú nabhuka bhú Kilisito.

Yi lu kpekpeke bhú nabhuka inde u asuno e pi yi-o

⁶ A na paká me yi asia Yesu Kilisito maka Ngámá. Kaka-a, yi dú bhú makpɔtɔ ne ani. ⁷ Yi to sie yi bhú ani, makobho gba yi dú la di me a nde alu bhú ani. Yi dú ndu 'kpí hana me yi nde alu kpekpeke bhú nabhuka, nakpata lele nasuno inde yi asia e-o. Yi bedhe ne nagie heni pi Ebhe.

⁸ 'Ee! Yi lila liyi me kpála bini aholo yi li ekú ne obabadha oeli na eu, di ne imbilangu gba kpálakuti de. Padhá de, anga a ngalu pí nasuno gba okpála, a di ngalu pí angu na obua na doto inde. A alu pí Kilisito de. ⁹ Padhá de, anga ndu 'ngú hana inde bhú Ebhe-e asia kute bhú Kilisito. A la di ngadu hana libhomu bhú ani. ¹⁰ Yi asia la di ndu 'ngú hana má kpəkəbhə bhú Kilisito. Ngaani-e, ani ne angu pí 'ndji osisiti bua inde ngau, inde la di ne angu-o.

¹¹ Bhú nakpɔtɔ liyi ne ani-e, yi ali gandja. Gandja ango-o, akodho ne 'kpa kpála de. Engú bini, gandja ango-o ayie ka Kilisito, ngabula nagbegbe yi bhú 'ngú inde adu ato yi bhú siti 'ngú-o. ¹² Padhá de, anga li yi asia batisimo lie-e, u azi yi bhú dabili bini ne Kilisito. Yi atsia azuku la di bhú dabili bini ne ani. Padhá de, anga yi abhuka angu gba Ebhe inde azuku ani bhú ká okpála inde amu-o.

¹³ Nani kalanu-o, yi adu me yi nde amu li bhobua yi amu kabula siti 'ngú gba yi-o. Padhá de, anga yi adu me yi nde li gandja de. Yi adu la di omupagano. Engú bini, mbia inde-e, Ebhe amene me yi dú bhú makobho ne Kilisito. Ani

ambu li sisiti 'ngú gba ní-e hana. ¹⁴ Aní abulú balúá inde adú na'o 'ngú pí ní, inde adú di napa 'ngú li ní sisiti ka ongú inde u aye e bhúbhú-o. Aní abhèlè engú ango-o li u abhi ani lie li kulusi-o. ¹⁵ Ka kulusi gba Kilisito-o, Ebhe a'e angu gba osisiti bua inde ngau, inde la di ne angu-o. Aní atsia asuno nayie ka uo mbámbá maka okpála na 'kpú inde ngadhukú bhú galasisi li Ndili gba aní aha angu uo lie-o.

¹⁶ Kaka-a, yi a'ó kpála bini de me aní 'o 'ngú pí yi pindji ezú inde yi nde ngazú e, di ne engu inde yi ngandji e, i dú di-e pindji engú na anokomia , i dú di-e ne epe inde akoto na mbia, di ne ekpí nague de. ¹⁷ Ndu ongú bhomu-o hana ne kulu ongú na babadha inde ngago-o. Engú bini, engú na kukulu-o ne Kilisito. ¹⁸ Yi a'ó de me kpála bini 'o 'ngú pí yi-e de, okpála inde ngakpi djali bhú nakè lío ne kuto bhú namene ongú inde ngau lie mau-o de. La di ne bhú nayo oandjelu maka Ebhe-e, u ngaha lío pí ongú inde u ngau e-o. U abedhe ne 'ngbé 'ndji li tata nde lie ade, li mabhundja gba o na kpála-kuti ngatima me u mene e-o. ¹⁹ U ngayala nagbite lío li Kilisito inde maka endji na kute. Padhá de, anga kute ango-o libhomu ngasia angu ka Kilisito, a ngagbite la di lie bhú dabili bini maka li Ebhe akúnda lie-o.

Yi amu bhú dabili bini ne Kilisito, yi la di ngakobho bhú dabili bini ne ani

²⁰ Lí yi akpi lie bhú dabili bini ne Kilisito, yi atsia akoto bhú bali sakpa obua inde ngau pí doto-o, la ka ni yi ngamene 'ngú lie maka okpála

na doto? Ka ni yi aziba lie me u ha olíli pi yi me: ²¹ mo ohá ehe inde-e de. Mo olé ehe inde-e de. Mo obú 'kpa mụ tété de. ²² Angu na ndụ 'he bhomụ-o ngandjia hana má kpøkøbhø nedhinga li okpála ngamene kulu lie ne di-o. A bhomụ-o olíli di ne nasuno gba okpála. ²³ A na paká me olíli bhomụ-o ngau lie maka bhende na imbilangụ. Padhá de, anga a ngagama 'ngú pindji mayo gba okpála, di ne nakø lio ne kuto di ne namene kute o kpekpeke. Engú bini, olíli angoo ne angu bini ade ngubula naha angu gumụ na sisiti gba kute ní-o.

3

Yi gili ongú inde abhúlá

¹ Yi azuku bhú dabilí bini ne Kilisito . Kaka-a, yi gili ongú inde abhúlá li bilí li Kilisito adu lie li pá 'kpa na kokpa gba Ebhe-o. ² Yi ha liyi libhomu ngubula engú na abhúlá. Yi adú ne naha liyi ngubula engú na píla doto inde-e de. ³ Padhá de, anga yi amu, mukobho gba yi atsia awo lie bhú dabilí bini ne Kilisito bhú Ebhe. ⁴ Mukobho gba yi na kükulü-o ne Kilisito. La di-e, li aní asúno lie lie, yi azé bhadi ne uo bhú sangu-o bhú dabilí bini.

⁵ Kaka-a, yi bhøø ogumụ na doto inde li bhobua yi-e mabhøø: a ko zabhe, zibotü, gumụ kute, gumụ na sisiti, gumụ 'he inde maka nayo ebhe na eu-o. ⁶ Ongua ongú bhomụ ngagbele ke 'ngú gba Ebhe-e pí okpála inde ngandjo 'li ani-e ngae. ⁷ A bhomụ-o lele maka yi adu nani lie li nedhinga yi adu amene siti 'ngú lie-o.

⁸ La mbia inde-e, yi bala ndu ongú bhomu-o hana: ndu bua, nake 'ngú lio, ne siti bua . Sobho ne siti 'li akóto bhú 'bhø yi de. ⁹ Yi apá eu sùnda yi de, anga yi a'o ká mukobho gba yi na didili-e ne ndu 'ngú ango-o hana. ¹⁰ La di-e, yi akolo bhú mukobho na mbia, anga yi akolo okpála na mbia inde li Ebhe ngamene lie me u kolo maka ni Ebhe gba yi, amba u mbila ni ndjindji. ¹¹ Kaka-a, mbia inde-e, angu napa me: a inde-e omaYuda, obhende ne omaYuda ade, a inde-e okpála ali gandja, obhende i li gandja de-e matá ade. Ogandji okpála , di ne obhende i mbila lio ne nakobho ne okpála bhende bhú bali ade-e matá di ade. Obalise, ne okpála bhende bhú bali ade-e matá di ade. Engú inde pi ní ngbéngbé-e, a ko Kilisito, inde ale pi ní bhú ndu 'ngú hana.

¹² Yi ne okpála gba Ebhe. Aní abhu yi, aní la di ne mukúnda pi yi. Kaka-a, a ayo me yi du ne ndjinga. Yi du ne bádha bua. Yi kò liyi ne kuto. Yi du ne guo 'ngú di ne 'ndjá bua. ¹³ Yi kibila liyi sùnda yi makibila, amba yi du di ne mambu. Li kpála du ne engú ne kilí e-e, aní de mbu li aní maka Ngámá ambu nani li yi lie-o. ¹⁴ Bhú ndu 'ngú bhomu-o hana-a, yi du ne mukúnda sùnda yi, anga mukúnda ne ekpú inde ngagbite yi bhú dabilí bini. ¹⁵ A ayo me guo 'ngú gba Ebhe-e si kuti e li bua yi. Ebhe a'i yi kabula guo 'ngú ango-o me yi du bhú koli kute bini. Yi du okpála inde ngagie heni pi Ebhe. ¹⁶ A ayo me eli gba Kilisito ne obabadha ndu 'ngú gba aní-e hana adu li bua yi. Yi suno ongú sùnda yi, amba yi ha la di líli sùnda yi ne imbilangu hana. Yi li ndu oetsi hana

pi Ebhe ne bua yi hana, di ne nagie heni pi ani.
¹⁷ Ndu 'ngú hana inde yi ngamene e, i du bhú nagama 'ngú, i du di-e bhú namene ehe-e, yi mene ne 'li ngámá Yesu, ne nagie heni pi 'Dyi ní Ebhe li pápá gba ani.

Engú inde a ayo me omabhuka kpata e bhú mukobho na mbia-o

¹⁸ Ngayi olisi-e, yi manga obhosi gba yi-e mamanga maka a ayo lie me yi mene kala Ngámá-o. ¹⁹ Ngayi obhosi-e, yi du ne mukunda pi olisi gba yi-o. Yi aná bhúla yi pi uo de. ²⁰ Ngayi ongisi-e, yi mene líli gba okpála inde azu yi-e bhú ndu 'ngú hana. Padhá de, anga a bhomu-o engú inde li Ngámá akunda e-o. ²¹ Ngayi odyi ongisi-e, yi adú nambembe bhú 'ndji ongisi gba yi-e de, amba bua uo asía ndala de.

²² Ngayi obalise-e, yi mene líli gba omakulasi yi píla doto bhú ndu 'ngú hana. Yi améne bha bini li nedhinga u nde ngalila yi lie ngubula me u ziba yi-e de. Engú bini, yi mene líli gba uo-o ne bua bini kabula yi ngamanga Ngámá lie-o. ²³ Bhú ndu 'ngú hana yi nde ngamene e, yi mene ne bádha bua mugito me yi ngamemene pi Ngámá. A aú lie de me yi amene pi kpála de. ²⁴ Yi mbila ndjindji me Ngámá ahá makalá pi yi maha. Yi asía bádha 'ngú inde ani a'o e pi okpála gba e masia. Padhá de, anga Músuno na kukulú inde yi ngamene kulu pi e-e, a ko Kilisito. ²⁵ Engú bini, kpála inde amemene siti 'ngú-o, asía makalá na siti 'ngú gba e-o. Padhá de, anga Ebhe gbogbo bhusu okpála de.

4

¹ Ngayi omakulasi okpála-a, yi mene obalise gba yi-e ndjindji. Yi da di pi uo ne ngbili 'ngú . Yi mbila ndjindji me ngayi-e, a di ka yi ne Makula yi inde abhúlá.

Líli pi omabhuka

² Yi gbite liyi li mayo. Yi da li zaku bhú nayo Ebhe ne nagie heni pi ani. ³ Bhú mayo gba yi-e, yi yo Ebhe di pi ya, amba ani ha kpadji pi ya ngú nakpokpo eli gba ani, di ne nakpokpo engú inde awo* lie bhú Kilisito-o . Padhá de, anga ma mbia inde bhú tikpu kabula 'ngú ango-o. ⁴ Yi yo ka Ebhe me ma kpokpo 'ngú li 'ngú inde awo lie bhomu, di ne me ma suno mbámbá maka a ayo lie-o.

⁵ Yi dhuku bhú ká okpála inde ne omakilisito ade-e ne imbilangu, ne namene kulu ndjindji bhú ndu nedhinga gba yi-e hana. ⁶ A ayo me 'li yi da ndu 'kpí hana ndjindji, ati la di li bua okpála. Yi mbila liyi ne nagie bádha 'li pi ndu okpála hana.

Polo bhú dabili bini ne obi e yi omabhuka mayi

⁷ Tisiko akpókpo ngali gba ma pi yi ngae. A ko ndai ní na mukunda, a ko bádha kpála na kulu. A ko kpála na kulu na kukulu bhú dabili bini ne ma bhú kulu gba Ngámá-o. ⁸ Kaka-a, ma atima ani ngaani makpe agba yi ngú nakpokpo lele maka ya nde lie pi yi, di me ani to masi bhú yi. ⁹ U adhuku bhú dabili bini ne ndai ní na mukunda

* **4:3** 4:3 Engú inde awo lie: A ko ngali gba Ebhe inde u mbila nga nani e kalanu de-o. Ngali ango-o, a ko Kilisito.

inde la di ngbingbili, Onezime inde sũka yi-o. U akpókpo ndũ 'ngú inde ngakodho 'kpí ei-e pí yi hana.

¹⁰ Alisitaluko inde bhú dabilì bini ne ma bhú tikpũ-o, yi yi mayi. A la di-e Maloko, dhongba gba Balanabasi-o. Yi adje engú pìndjì Maloko adje, i dũ me anì nde anũ agba yi oo, yi de sia anì ndjìndjì. ¹¹ Yesu, inde u agisila 'lì e me Djusitusi-e, yi di yi mayi. Bhú ká omaYuda inde abhuka-a, a ko bha bini okpála bata bhomũ, inde ngamene kulu bhú dabilì bini ne ma ngũbula Naũ gba Ebhe-o . U ateteke ma naali.

¹² Epafalasi, inde di ne sũka yi-e, yi yi mayi. Ngaani inde kpála na kulu gba Yesu Kilisito-o, ndala li nayo Ebhe pí yi de. Anì ngayo Ebhe me yi dũ omakilisito na kũkũlũ, amba yi mene la di ndũ 'kpí hana engú inde li Ebhe akũnda e-o. ¹³ Ma ti da napa li anì pí yi me, anì ngadje likabhu naali pí yi, pí okpála na gũdhũ na Laodikia di ne pí obhende na Yelapolisi.† ¹⁴ Luka, matia gba ní na mukũnda, di ne Demasi yi yi mayi.

¹⁵ Yi yi ondaise ní na Laodikia di ne obhende na Nimifia bhú dabilì bini ne Dadjua gba Ebhe inde bhú 'ti gba anì-o. ¹⁶ I dũ me yi nde atanga balũa inde-e, yi de tima pí omabhuka na Dadjua na Laodikia, amba yi tanga di balũa inde ayíe ka uo oo-o. ¹⁷ Yi pa pí Alukipo me: «Mene kulu gba Ngámá inde u a'o e sakpa mũ-o ndjìndjì.»

¹⁸ Ma aye engú nayi yi bhomũ-o ngama ne 'kpa ma makpe. Ma ayi yi mayi. Yi a'ílì 'to yi de me

† 4:13 4:13 Ogũdhũ bhisi inde-e, a de gũdhũ na Kolosai.

ma bhú tikpɛ-o de. A ayo me bádha bhú 'bu gba
Ebhe-e dɛ bhú dabilì bini ne yi.

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 3 Mar 2023 from source files
dated 29 Jan 2022

6b4904fb-f8ce-5931-8218-7cee8914232c